

يم النهر شفت الغمر متعفر وهامه انطبر
فوك الثرى ابلا چفين عينه بسهم مخسوفه

عگلي انشغل متدوهن ابلا رايه
وانا انظرك بس جئه ابلا رايه
أمگطعه انفاسي وچئي ابلا رايه

يم الجسد ضاع الجلد اچي و لا يسمع احد
يا ليته يلفيني البين ويطبگ عليا احتوفه

عطشانه روعي وعشرتك ماي ألها
من شوفتك بس يعتدل مايلها
صدگني عنك هالگلب ما يلهي

أجري الدمع محني الضلع إرحم دليلي المنفجع
أچي وصدى عتبي ونين والدمعه دم مذروفه

وينه التعهد أخته من لازمها
والرايه بس يم محملي لازمها
حالف إذا كر عالعدا لازمها

راية علي من تعتلي خدري بأمان ومحملي
بس يا حسافه بها الحين مطويه و ملفوفه

مليت وصبري بمهجتي ملآني
ودهري هموم بغيبتك ملآني
لأن الصخر بس قلبك الـ ما لآني

بس نفترگ أحچي صِدگِ نار وفوآدي يحترگ

تدري السفر تدري وين؟ أختك تطب الكوفه

ذبلانه روعي موادعك خلاها
حچي الشماته معذبه خلاها
عاف اخته ولدرب السبا خلاها

ليتك تجي وبيك التجي مثكوله گربك ارتجي

انته الحصن ماي العين والغيره الموصوفه

عن عهدك بكل العمر ما أبري
لو تاكل بجسمي العلل ما أبري
ولو تنعمي عيني وأظل ما أبري

يا بو الفضل ما احتمل بعدك على النوگ الهزل

اتلفت اشمال ايمين ومن العدا محفوفه